



Broj: T18 0 KT 0017875 24
Brčko, 10.03.2025. godine

Na osnovu člana 35 stav (2) tačka z) i člana 226 stav (1) Zakona o krivičnom postupku Brčko distrikta Bosne i Hercegovine podižem:

OPTUŽNICU

Protiv:

M. S., rođen ... 1985. godine u Visokom,

Što je:

Dana 06.08.2024. godine, oko 18,00 časova, u mjestu Brezovo Polje, Brčko distrikt BiH, krećući se magistralnim putem M-14/1 putničkim motornim vozilom „VW Golf“, reg.oznaka ... iz pravca Brčkog u pravcu Bijeljine, u selu Brezovo Polje, suprotno odredbi člana 174 stav (1) i (2) Zakona o osnovama bezbjednosti saobraćaja na putevima u Bosni i Hercegovini („Službeni glasnik BiH“ broj 6/06, 75/06, 44/07, 84/09, 48/10, 18/13, 8/17, 89/17, 9/18, 46/23, 88/23), svjestan da je u alkoholisanom stanju sa količinom alkohola od 2,53 g/kg, to jeste u stadiju teškog pijanstva i da je u takvom stanju očigledno nesposoban za sigurnu vožnju i da može ugroziti javni saobraćaj na putevima i dovesti u opasnost život ljudi i da krši saobraćajne propise, na šta je i pristao, pa dolaskom u blizinu kuće G. T., gdje je krivina sa zavojem ulijevo i blagi prevoj puta, protivno članu 39 stav (2) i članu 55 stav (1) Zakona o osnovama bezbjednosti saobraćaja na putevima u Bosni i Hercegovini, iako je znao da je dužan da drži vozilo u kretanju što bliže desnoj ivici kolovoza i na tolikoj udaljenosti od nje da, s obzirom na brzinu kretanja vozila, uslove saobraćaja i stanje i osobine puta, ne ugrožava druge učesnike u saobraćaju i sebe ne izlaže opasnosti, te da je pri mimoilaženju dužan da sa svoje lijeve strane ostavi dovoljno rastojanje između vozila kojim upravlja i vozila sa kojim se mimoilazi, a po potrebi i pomjeri vozilo ka desnoj ivici kolovoza, prešao u lijevu saobraćajnu traku namijenjenu za kretanje vozila iz suprotnog smjera, 0,5 m od središnje linije, pa je tom prilikom, prednjom lijevom bočnom stranom svog vozila, u lijevoj saobraćajnoj traci ostvario kontakt sa lijevom bočnom stranom motocikla marke „Suzuki“, reg.oznaka ..., kojim je upravljao V. A., a koji se kretao iz suprotnog smjera, pa nakon ostvarenog kontakta motorno vozilo „VW Golf“ se zaustavilo sa lijevim točkovima na lijevoj saobraćajnoj traci namijenjenoj za saobraćaj vozila iz suprotnog smjera, dok se motocikl marke „Suzuki“ zaustavio u desnom odvodnom kanalu, gledano iz njegovog pravca kretanja, gdje je na vozilima nastala materijalna šteta, a vozač V. A. je zadobio teške tjelesne povrede u vidu iščašenja desnog lakatnog zgloba, prelom koronoidnog nastavka desne lakatne kosti, prelom lateralnog epikondila desne nadlaktne kosti, prelom donjeg okrajka desne lisne kosti, te više lakih tjelesnih povreda,

dakle, pod uticajem alkohola upravljao motornim vozilom iako je zbog toga očigledno nesposoban za bezbjednu vožnju i time tako ugrozio javni saobraćaj, da je doveo u opasnost život ljudi, usljed čega je kod drugog prouzrokovana teška tjelesna povreda,

čime je učinio krivično djelo – Teška krivična djela protiv bezbjednosti javnog saobraćaja – iz člana 330 stav (1) u vezi sa 327 stav (1) Krivičnog zakona Brčko distrikta BiH.

****Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.****
